

Filipai Quraŋ

Polji Filipai yoŋore Quraŋ ruaya.

Mimitaniŋ

Polji misin gio roregaru bako ateine yoyoka fukeme Eisia Maino (Turkey) bokeru Yurop moreŋgo raya. Raru Rom prowins tinaine Masedonia oo maŋyaŋuŋ bapakareko kerisiebi Kristore kufufuŋ fuŋfuŋgaine oi Filipai sitio fukeya. Jiki aposol Pol oi Rom sitire witi pigo ruabi joiserereŋ paio ŋeko gio bobo ŋiŋigo goineji kiso etebuŋ. Oi etebi goineji Filipai maŋineo oŋuakoŋ buŋo kekesiine qaji yarebuŋ ore manebu maneya. Damaŋ oo Biŋe Quraŋine yo Filipai mamananisŋ kufufuŋ yoŋore quraŋgaya. Manebu eyayoŋ, jibu bobomiriŋ buŋo eru maŋkikitiŋ buŋo yo jeribari paio quraŋgaru ruaya.

Polji witi pigo ŋeko Filipai mamananisŋ kufufuŋ yoŋoji bapi ganimiŋ ore yaun ruabi wareya, iŋoji ore danŋe yajiin ore Quraŋ yo quraŋgaya. Oi quraŋgaru jikigaru maŋkikitiŋ buŋoine kokoine moko ruaya. Iŋoyoŋe koŋkoŋ fuŋne fuŋne maneme Filipai yoŋoji Polre buŋo oi manebi jibu sanaŋgaru koimo dimanimiŋ ore maŋyaŋuŋ kitiŋgaya. Kajeqouŋ buŋo goine oi iŋi: Iŋoŋo-ŋaŋunde saki ba ropeku egu aŋi sogo manenimiŋ ore siŋaŋ garu goinebi. Suroŋ fukeru jikigaru notono egu enimiŋyoŋ, Yesu oŋuine maŋ-ŋaŋuŋ bawaki ee eku goinebi. Buŋo yo egu niga ŋabein: Kristoke qakatoru dimagobi, oi Anuture yaun. Juda yoŋoji Mosesre Kadi buŋo buruine reŋgaru boyoberu Anuture mosi ya eegobiyon, maŋkekerisie ogopunoŋuŋ ŋoŋoji oŋu mata. Iŋoŋoji Anutu manesiŋ gabi yaunmoririine furiine tomiri ŋareme raugaru oo gogo gariine bofukeru gogobi. Uri yoŋoji Kristoke qakatoru gogobi, Anutuji oi womo eyareko jerieku goinebi.

Kristo manesiŋ gabeneŋ Anutuji manjeri noreko soine koimo paio sanaŋgaru gokimiŋ eru maŋkekerisie ogopunoŋuŋ yoŋoke moko yameŋ keku sanaŋgaru dimainebeneŋ. Polji ore buŋo oi kokoine quraŋgaya. Polji Filipai kufufuŋ yoŋore ohowe sanaŋine banimiŋ ore maneru goya, ore buŋo oi oŋuakoŋ totogo quraŋgaya.

Buk yoore mobe qoruine 7 oi iŋi:

Buŋo fuŋfuŋgaine 1.1-11

Polji uruŋu eru goya 1.12-26

Kristoke gogore fuŋne 1.27–2.18

Timoti Epafroditus yokore gio buruine 2.19-30

Kiso yonjoji eadu narebi egu wakiminij 3.1–4.9
 Polre ogopu Filipai gobuŋ, yonjore buŋo 4.10-20
 Qurande buŋo koruŋ qoruine 4.21-23

1 ¹Pol nonji quraŋ yo quraŋgago. Maŋkekerisie kufufuŋ gbagbataeŋine Kristo Yesuke qakatoru dimaku Filipai sitio gogobi, nonji sosowo ŋoŋo eru ŋoŋore qoruŋaŋuŋ (bisop, pasto) eru Biŋe gio bobo ŋiŋigo goine (dikon) babapi ŋoŋoke buŋo mimane ekiminij ore manego Timotiji noke yoo goku niko Kristo Yesure kiŋaŋ qaku gogobere.^a

²Anutu Mamanonjuŋ eru Ofonj Yesu Kristo yokoŋi yaunmoriri narebire womoo goinebi. Onu manego.

Polji Anutu miteŋ gaku oŋga wosiga.

³Nonji manesu nabeego ore so Anutu miteŋ gaego. ⁴Damaŋ so sosowo ŋoŋore Anutu oŋga wosiego, oi jeri paio oŋga wosiego. ⁵Nonji Anutu inji ore miteŋ gaego: Iŋoŋo Bobiaŋ Biŋeo qakatobuŋ, damaŋ fuŋfuŋgaine oone akonj fuŋgaru noke maŋkekerisie gio baku kitij nuru go waperu gogobi. ⁶Anutuŋi maŋ-ŋaŋuŋgo gio fiine fuŋgaru baku goga, oi jikigaru bame Kristo Yesuji moke fukeinde damaŋji tariiŋ. Onu manesiŋ garu sanaŋgaru Anutu miteŋ gaego.

⁷O sagesaŋuŋ nobe, yoro ogopune fukegobi ore ŋoŋo sosowo onu manesu narebe fiine akonj sagaga. Anutuŋi gio nareme ore eru damaŋ yoo witi pigo ŋeego. Damaŋ goineo Bobiaŋ Biŋere keteŋ (defence) fukeru jigo qaku bobojibu buŋo kepieru buŋo foforiineji sia goduine baku sanaŋgaiŋ ore roregaego. Onu me onu baego, sosowo ŋoŋoji noke dimakabi yaunmoriri oiji akonj saga nabe me gione kitiŋgabi moko kiwaqawaineke fukegobeneŋ. ⁸Kristo Yesuji ŋoŋo maŋjoko eŋareŋ ore dobe nuega, nonji oi maneru ore paio dimaku sosowo ŋoŋore aŋi sogo maneru ŋone nabeŋgo yameŋ keku gogo. Onu miku buŋo foriine migo, oi Anutu injoyonje soine kitij nuru miŋ.

⁹Nonji ŋoŋore inji oŋga wosiego: Anutu, go Filipai ogopune dobe yabende jikigaru sanaŋgaru maŋjoko ee ekabi maŋjokoyanjuŋi sogueru saueiŋ. Onu fukeme soine kadi foriine ŋone mukuru bobojibu buŋo bokeru goniminij. ¹⁰Onu goku soine buŋo osoeru kadi fiine sari rosoeru gbagbataeŋine fukeru bakare buŋoyaŋuŋ tomiri go ropebi. Kristoji kirieru wareiŋ. ¹¹Jikigaru inji oŋga wosiego: Yesu Kristoji eebobo posiine maŋgo eteko ore fori fukeeiŋ. Foriine oiji maŋ-ŋaŋuŋ puseko ŋiŋigoŋi onu ŋone naberu Anutu miteŋ gabi tinabiŋeineiŋ saueiŋ ore oŋga wosiego. Buŋo oi foriine.

Pol witi pigo ruabi Biŋe buŋoji sanaŋgaya.

¹²O maŋkekerisie ogopune, ŋoŋoji nonde fuŋne mane mukuniminij ore inji maneru quraŋgago: Ya sembene nondeo fukeyayonj, jibu ore biŋeineiŋ

^a 1.1 Apo 16.12

saueme Bobian Biŋenonunji ŋiŋigo saga yabeme giononunji moririineke fukeega. ¹³Nonŋ Kristore giore eru niginji kipe nubi Rom yoo ŋego, buŋo oi mamari ŋi sosowo Sisa-kiŋ koitore siŋaŋyayabe pi siŋaŋ gaegobi, yoŋoji manegobi eru oŋuakonŋ ŋiŋigo goine kokoine yoŋore kajeyaŋuŋgo rakame mane foregobuŋ.^b

¹⁴Jikigaru foriine iŋi fukeya: Maŋkakerisie ogopunonunji witi pigo ŋebe damaŋ yoo Ofonji bapi nuela ore buŋo manebuŋ. Oi maneru boakonji Ofonke sanaŋgaru qakatoru dimaku yameŋ keku koimo fukebuŋ. Oŋu fukeru Anuture buŋo kokoi tomiri misauebi jikigaru raega.

¹⁵Goineji nonde manebi ropeko maŋ aŋi gbagbataeŋineji dimaku Kristore fuŋne mitaŋiŋgaegobiyonŋ, goineji nonde eru maŋyaŋunji qougaroiŋ eru ŋadi nuru kekepari eiŋ ore manegobi. ¹⁶Ogopune foriine yoŋoji nonde fuŋne iŋi manegobi: Anutuji igodonŋ nume Bobian Biŋere ketenŋ (defence) fukeru jigo qaku bobojibu buŋo kepieego. Oŋu maneru maŋjoko enareku kitinŋ nuegobi. ¹⁷Ŋadiqoqo ŋiŋigo yoŋoji yoŋoyaŋunde akonŋ manesuku furire ore gbedigabi maŋyaŋuŋ kejiŋgako nonde gio nodureiŋgo maneru Kristore fuŋne oŋu mitaŋiŋgaegobi. Oŋu eru witi pigo ŋego, damaŋ yoo mibabawaki ebi sisibiri jikigaru fuke nareiŋgo manegobi.

¹⁸Oŋu manegobiyonŋ, oi jibu. Kristore fuŋne oi ya oo gbedigaru keoma eegobi me Anuture mimiti poretiŋ reŋgaru mitaŋiŋgaegobi, oi nonji manebe sagaga. Oŋu me oŋu fukeiŋ ore eegobi, maŋneji ore eru fiamе fofori jeriego eru jeriebemiŋ. ¹⁹Nonde oŋga wosibi Yesu Kristore Moro Tiriineji kitinŋ nuko soine pirue nubi wakibeminde kamasi manego. Oŋu fukeiŋ ore maneru ore eru jerieego. ²⁰Ya mo baku gogu mimi egu bofukebemiŋ ore origago. Oŋu mimineke matayonŋ, damaŋ so Kristo miteŋ gaku gobonŋ, ore so damaŋ yoo oŋuakonŋ fukeiŋ ore manego. Saki funeji komebemiŋ me gobemiŋ, oi jibu koimo paio Kristo miteŋ gabe tinabiŋeineji sogueiŋ.

²¹Nonji sakineke gobemiŋ ine, gogone Kristore tinabiŋeji sogueiŋ ore eru gobemiŋ. Nubi komenobo ine, oiji bobian nuko Sombuŋgo seŋgiŋbaŋgiŋ fukebemiŋ. ²²Oŋu fukenoboyonŋ, moreŋgo saki fuke gobemiŋ ine, mande gio babe jikigaru foriineke fukeeiŋ. Oi manesuku nakenere gogo me kome rosoenobo, oi soine so manego. ²³Gobemiŋ me komebemiŋ fiine fukena oi poretiŋ so mane mukuru botuyakuŋgo quŋgaru gogo. Kristoke paibe gonobo, oiji ya sosowo odureru moriri soguine bofuke narena. Ore eru moreŋ bokeinde aŋi maneru gogo.

²⁴Oŋu gogoyonŋ, saki fuke bojororu gobemiŋ ine, oiji ŋoŋo bapi ŋabebe foriine ŋoŋoreo fukeiŋ. Komenobo, oiji ŋoŋo so bapi ŋabenobo. ²⁵Oŋuine manesiŋ garu sanaŋgaru ore eru ŋone nuru embonŋ eru jikigaru goku

^b 1.13 Apo 28.30

sosowo ŋoŋo bapi ŋaberu goiŋgo manego. Bapi ŋabekabe mamanesiŋ-ŋaŋunde foriji sogueru sananŋako soine mokemoke yobu jerieru gonimiŋ. ²⁶Oŋuakonŋ Kristoji ŋone nuru embonŋ eru moke ŋoŋoreo warebe ŋoŋo soine nonde eru Kristo Yesu mokemoke yobu miteŋ garu gonimiŋ. Oŋu.

Mamanesiŋ-ŋaŋunji sananŋaiŋ ore jigo qaku goinebi.

²⁷Eeboboŋaŋuŋ oi Kristore Bobiaŋ Biŋeji kuririineke fukeinde so eba eku goinebi. Oŋu gobi ŋoŋoreo wareru ŋone ŋabebemiŋ me so wareru taitai goku biŋeŋaŋuŋ manebe fuŋneŋaŋuŋ iŋi peme sagaiŋ: Ŋoŋo qoqodure buru moakonde buŋo kiperu maŋmoakonŋ eru dimainebi. Oŋu dimaku Bobiaŋ Biŋere buŋo foriji egu gbaŋiŋ ore moko kiperu jigo qaku goinebi. ²⁸Oŋuakonŋ goineji kiso eŋareenimiŋ, ŋoŋoji buŋo miyaŋuŋ fuŋne fuŋne ore eru so popureru maŋ-ŋaŋuŋ so wakiine. Fuŋneŋaŋuŋ oŋu manebe sagaiŋ. Anutuji usuŋ ŋareme kiso ŋiŋigo yoŋoji fuŋneŋaŋuŋ ŋoneru iŋi mane taniŋganimiŋ: Yoŋoyaye waki yabeko sibirigabi Anutuji bomuku nobeko paibe seŋgiŋbaŋgiŋ gokimiŋ.

²⁹Anutuji buruine rua ŋareya, oi iŋi: Ŋoŋo Kristo manesiŋ gaku aribe jerieru aribe iŋore eru joiserereŋ maneru gonimiŋ. ³⁰Nonji mamanesinde jigo rone ŋoŋoke goku qabe, ŋone nubuŋ eru damaŋ yoo jikigaru qaego ore biŋe buŋo yo manegobi, ŋoŋo jigo oŋuine akonŋ noke kitiŋgaku qaku gogobi, oi manego. Oŋu.^c

Kristore so ŋoŋo-ŋaŋe babawaki ee eku goinebi.

2 ¹Ŋoŋo Kristoke qakatoru maŋ-ŋaŋuŋ kikitinŋ ee enimiŋ ore uŋsowonŋ bofukeinebi. Kristoji maŋjoko eŋareru bobomiriŋ ŋabeinŋ. Moro Tiriineke rowegaruru dimaku ohoweŋaŋuŋ baku ŋonemaiŋ eŋareine. ²Oŋu egobi ore maŋmoakonŋ mamane boyoberu sogokonŋ maŋjoko nadunŋgadunŋ eku womoo goinebi. Ŋoŋo maŋ aŋiŋaŋuŋ eru mamane buruŋaŋuŋ moakonŋ enimiŋ ore kipeinebi. Buŋo oŋu kiperu maŋmoakonŋ ebi foriine fukeinŋ.

³Yareya ŋoŋo-ŋaŋunde akonŋ furuganiminde aŋji so maŋgo eŋareine. Ŋoŋo-ŋaŋunde tinabiŋeji sogueinŋ ore sakiŋaŋuŋ so ba ropeinebiyonŋ, maŋ-ŋaŋuŋ babawaki eru goine yoŋore manebi ropeine. Oŋu maneru nonji ŋoŋare mokemoke yobu jerieru gobemiŋ. ⁴Ŋoŋo moakonŋ moakonŋ ŋoŋo-ŋaŋunde maŋ akonŋ fiaŋ ore so manesuinebiyonŋ, goine yoŋore maŋji fiaŋgo ore oŋuakonŋ yameŋ keku manesuku goinebi. ⁵Kristo Yesuji moreŋgo gome maŋ mamane pe teya, oŋuine akonŋ ŋoŋoreo peko oi boyoberu goinebi.

⁶Anuture mosi oŋuine pe teko goyayonŋ, jibu Anutu oŋuine goya ore so gbedigaruru ropeine so goya.

^c 1.30 Apo 16.19-40

- 7 Oŋu matayoŋ, iŋoyoŋe afagaru Anuture kuririquaraŋ bokeru wakiru kerisieru ŋi kamasi fukeru kiŋaŋqoqore kamasi roru goya.
 Oŋu moreŋ ŋi noŋunde kamasi fukeru goya.
- 8 Oŋu goku maŋine babawaki eku Mamainere mi buŋo damaŋ so reŋgaru goya. Oŋu gome mimi qa teru “Maripongo qabuŋyoŋ,” jibu, damaŋ oo oŋuakoŋ reŋga foreya.
- 9 Oŋu reŋgaru goya ore eru Anutuŋi ogame paibe roperu ŋeko tinabiŋe ropekiine oteya, oiji tina goine sosowo yadureega.
- 10 Anutuŋi tinabiŋe ropekiine oi iŋi ore oteya:
 Ŋiŋigo sosowo noŋuŋ tina ore eru damaŋ mogo dikanŋi keru Yesu miteŋ gakimiŋ. Goineŋi Sombuŋ karorago paibe gogobi. Goineŋi moreŋgo yoo gogobeneŋ. Goineŋi komeru kome kaeo me misoŋ kaeo gogobi. Noŋuŋ sosowo qodureru daberu dikanŋi ketekimiŋ.^d
- 11 Sosowo noŋuŋ dikanŋi keteru minoŋuŋi Mama Anutu toтого araŋ baiŋ ore tinaine mifukeru iŋi mikimiŋ,
 “Yesu Kristoji Ofoŋnoŋuŋ fukega.” Oŋu.

Yesure tatama oi ŋiŋigo botuyaŋuŋgo yaduru goinebi.

12 Ore eru yoro ogopune, ŋoŋo Kristore soso boyoberu oo so gbaŋiru wakiinebi. Damaŋ so Anuture buŋo reŋgaru qowirieru gobuŋ, ore so mosiŋaŋuŋi maŋkekerisie ŋiŋigo ŋoŋoreo sagaga, oi yameŋ keku boyoberu mande gio baku goinebi. Nonŋi ŋoŋoke gobonŋ, damaŋ oo Biŋe buŋo fiine akoŋ kegboreru gbiŋ keru dimaku gobuŋ. Boke ŋaberu taitai gogo, damaŋ yoo oŋuakoŋ Anuture jiŋomaio sombuŋaŋuŋ maneru gburugburu yabeme damaŋ so gio oi basarigaru goinebi.

13 Anutu iŋoyoŋe ŋoŋo jijiŋi boburo ŋaberu iŋoyoŋunde burure so maŋ-ŋaŋuŋ bapakareega. Oŋu oo maŋ aŋiŋaŋuŋ Anutureo sagaiŋ ore so fukeko dobe ŋabeko gioine babi foriine fukeeine.

14 Siŋaŋpuŋaŋuŋ yoŋoke buŋo babawaki so eru goinebi. Mikesoŋ eru maŋi ŋunuŋ-ŋunuŋ kosa so einebiyoŋ, burunoŋuŋ sosowo maŋyoka miaqaya bokeru mitiga ŋareme oi damaŋ so baku goinebi. 15 Oŋu eku eeboboŋaŋuŋi bakare buŋo tomiri gbagbataeŋine fukeru eba eku goinebi. Ŋiŋigo kekesiine iŋgoŋmaŋgoŋine muŋambe moreŋgo gogobi, ŋoŋoji yoŋore botugo Anuture odumade posiine yobu goinebi. Bobuŋ qonikiŋgo paibe tamaegobi, ŋoŋo oŋuakoŋ moreŋgo eebobo poretiŋinere kadi fiine yadubi oiji ŋiŋigo tamae yareku goinebi.^e

16 Oŋu goku gogo sanaŋinere Biŋe buŋo damaŋ so jaueru roru ŋiŋigo yareru goinebi. Oŋu gobi Kristoji kirieru wareiŋ, damaŋ oo nonde fuŋne iŋi fukeiŋ, “Masiri ŋiji sisirio gbiŋ eiŋ ore tobiriine qojuŋgaru raega, nonŋi ore so mande giore saki qaku basanaŋgaru gobonŋ. Oi omaine yobu so

^d 2.10 Ais 45.23 ^e 2.15 Dut 32.5

baku gobonyon, ore foriine fukeya.” Fuɲne onju fukeme soine nakene saki ɲonjore eru miteɲ gabemiɲ.

¹⁷Nonji gogone kisiɲgaru mitari ɲarebe Anuture gio reɲgaru baku gobon. Onju gobe ɲonjo maɲ-ɲaɲuɲ kerisieru Anutu manesiɲ gabuɲ ore foriine fukeega. Ore eru Rom gawman yonjoji buɲone mitariru joma onjuine nuku boji ririga ore so enarenobuɲ. Saki funere dari onju kesenobo ine, oi obu onjuine mo yobu so rakana. ɲonjore mamanesiɲ giore forire eru oi kuririineke fukebe sagana. Ore eru nubi komenoboyon, maɲneji jibu jerieego eru sosowo Anuture biɲe fukeru ɲonjoke moko goku jerieekimiɲ. ¹⁸Onjuakon ɲonjo jerieinebi eru noke jerieru goinebi. Onju.

Timoti sorebe Filipai ɲonjoreo foɲ.

¹⁹Ofoɲ Yesuji nonde maneko sagaiɲ ine, pipa Timoti soreiɲgo maneru origago. ɲonjoreo foru biɲenonjuɲ ɲajime jeriebi ɲonjo uruɲu gogobi, oi maneru kirieru wareru najime maneru nonde maɲji onjuakon fiaru oroine yobu fukena. ²⁰Mamanesiɲ-ɲaɲuɲgo sananɲagobi me wiriebi, iɲoji iɲoyonɲe akon ɲonjore manebu onju maneru nonde keririɲgo dimaga. Goineji yoo gogobi, yonjoji “Yonjoyaɲunde manebu,” miku kitiɲ ɲabeɲ ore so maneegobi Mata yobu. ²¹Yonjoji sosowo yonjoyaɲunde yare maneru oi keporeru bosogueiɲgo janjanbumbuɲ odeegobiyon, Kristo Yesure gioji foriineke fukeeiɲ ore so yameɲ keegobi. Yonjo qaɲosori kosa gogobi.

²²Kosa gogobiyon, Timotiji fuɲine fiine oduya, oi ɲonjo-ɲaɲe mane mukugobi. Madeji iɲoyonɲunde mama kiɲaɲ qa teega, iɲoji ore so noɲ Bobiaɲ Biɲe misaueiɲ ore bapi nuru kiɲaɲ qaku goya. ²³Ore eru Rom gawman yonjoji noɲ uruɲu enarenimiɲ ore buɲo kipenimiɲ, oi maneru soine Timoti sorebe pipa ɲonjoreo foɲ ore origago. ²⁴Nake onjuakon Ofoɲke dimaku damaɲ so joroko ɲonjoreo wareinde koimo onju manesiɲ gago.

Epafroditus sorebe Filipai ɲonjoreo foɲ.

²⁵Nonji ya baaru embimbiɲgaru gobe ɲonjoji muraɲne Epafroditus sorebi wareru kitiɲ nuku bapi nuya. Iɲoji Bobiaɲ Biɲere keten (defence) fukeru nonde keririɲgo gio baku jigo qaku goyayon, jikigaru kipenobo, oiji so sagana. Onju manesuku maɲkekerisie ogone oi damaɲ yoo sorebe ɲonjoreo kirieru wareiɲ. ²⁶Iɲoji sosowo ɲonjo ɲone ɲabeɲgo yameɲ keku goga. Jibe bame peya, ɲonjo buɲo oi manebi ɲonjoreo yobinɲgame maneru ore eru maɲwawaki goga. ²⁷Iɲoji fofori jibe eteme kome maigaru eyayon, Anutuɲi ɲonemaɲi oteko fiaya. Anutuɲi Epafroditus oi akon so ɲonemaɲi oteyayon, noɲ onjuakon ɲone nuru embon eru baafe nuya. Iɲoji komena ine, nakene beusembeji sogueru saueru paine paine ropeko gonobo.

²⁸ɲonjo Epafroditus ɲoneru moke jeriebi nonde beusembeji onjuakon afagaiɲ ore manego. Ore eru damaɲ yoo akon pipa sorebe ɲonjoreo

foinj. ²⁹Ɔɔɔ Ofonde ɔɔɔ ɔɔɔ ore mokemoke yobu jerieegobi, jeribari ore paio ɔɔɔ wareme keporeinebi eru gio bobo ɔɔɔ ɔɔɔ ore ɔɔɔ oi aran ba yareru goinebi. ³⁰Ɔɔɔ Kristore gio ore eru kome maigaru roperu komeij eya. Ɔɔɔ noɔ kitij nuku bapi nunimijgo manebunyon, oi embimbingabun ore ɔɔɔ ɔɔɔ ore tife ɔɔ enareijgo ore wareru gogoine kisingaru sibirigaj eya. Ɔɔɔ.

Posiine fukekiminde kadi foriine oi inji:

3 ¹O maɔkekerisie ogopune, bunjo korun inji jikigaru mibemij: Ɔɔɔ Ofonje qakatoru jerieru goinebi. Bunjo oi ɔɔɔ moke quranga ɔɔɔ ore tataki so manego. Ɔɔɔ goineji egu eadu eru bosembe ɔɔɔ ore oi quranga ɔɔɔ soine sagaga. ²Zioz gio bobo ɔɔɔ ɔɔɔ sembene ɔɔɔ ore siɔɔ-ɔɔɔ baku goinebi. Ɔɔɔ maɔkekerisiera yaura ɔɔɔ botugo roregaru maɔɔɔ bapakareru inji miegobi, “Anuture biɔe fukemimij ore ɔɔɔ moge baku sakiɔɔ ketigainebi.” Ɔɔɔ yameɔ keku bunjo akonj miku qoro rigajine ɔɔɔ gbogbo ɔɔɔ “Kufufun rangbanjine fukegobenj,” miku mo yobu miegobi.

³Ɔɔɔ Anuture jɔɔmaio so poreɔɔgobi. Sakiɔɔ moge oi akonj keti yabebunyon, foriine oi noɔunde inji fukeya: Anuture Biɔe bunjo maɔnoɔɔ bobogaya, noɔɔ injore maɔkekerisie kufufun foriine yobu fukeru gogobenj. Anuture tinao sakinoɔɔ moge ba norebun, niɔɔ ore paio so dimaku kitiɔɔ manesij gaegobenjon, Kristo Yesuji munaj qa noreya, ore eru injo miteɔgaegobenj. Anuture Moro Tiriineji dobe nobeko afagaru Anuture ohowe baku miteɔ gaegobenj.

⁴Goineji sakiɔɔunde yaji kitiɔɔ Anuture biɔe fukekimij ore manesij gagobi, nonji oi yadurego. Ore eru fiine akonj suhun ɔɔɔ furarieru tone ba pakereru erioɔbarioɔ kamasi enobo. ⁵Nonde kuririquan oi inji: Nonji Israel ɔɔɔ kubu maɔineo minebobo mo fukego. Apa ɔɔɔ kubu tinaine Benjamin. Maɔo mamane Hibru ɔɔɔ. Nonji yokoreone fukeru Hibru inji foriine fukego. Fukeru pebe una ⁸fukeko oo sakine ketigabun. Farisi fukeru gobonj ore Mosesre Kadi bunjo oi poreɔɔ boyobeijgo yameɔ keku gobonj.^f ⁶Farisi goku maɔne jo fukeko maɔkekerisie kufufun oi fofori kekesuesue eyareku gobonj. Mosesre Kadi bunjo reɔgaru boyoberu poreɔɔ fukemobenj ine, nonji ore so bakare bunjo tomiri posiine gobonj.^g

⁷Ya ɔɔɔ oi manebe ropeko oo kitiɔɔ manesij garu gobonjon, maɔne kerisieru oi sosowo bokeru gbaj sureru migo. Damanj yoo Kristoji munaj qa nareko qowiriebe, ore eru manebe ropeega. ⁸Ofoɔne Kristo Yesu mane mukuru seɔɔɔ bofukebemij, oi maneru osoebe furiine ropekiine ore so fukega. Ore eru gogone rangbainere kuriri yane sosowo

^f 3.5 Apo 23.6; 26.5; Rom 11.1 ^g 3.6 Apo 8.3; 22.4; 26.9-11

oi Kristo jikigaru oo bokeru gberɛ surego. Kristo bofukeru nonde ya sosowo oi manebe yau rasa yobu oɗuine fukeme sureru ɗadineo bokeboɗ.

⁹Goineji “Mosesre Kadi buɗo reɗga foreru oɗuine oiji niɗonoɗe Anuture jiɗomaio poretiɗ fukekimiɗ,” migobiyon, nonji oɗu posiine so gogo. Damaɗ yoo Kristo manesiɗ gabe Anutuji oɗuine oiji buɗone mitarime iɗore jiɗoo posikeru gogo. Mamanesiɗ paio gobe Anutuji ɗonemaiɗ enareku mitigako agiburaɗnere buɗoji komeko gogo. Kristoke qakatoru dimaku gobe Anutuji nonde fuɗne oɗu bofukeiɗgo ore yameɗ keego.

¹⁰Nonji Kristo iɗi mane mukubemiɗgo yameɗ keego: Kristoji komeru pakereya iɗore usuɗ oiji dobe nuko sanaɗgabemiɗ ore manego. Joiserereɗ maneya, oi iɗoke jikigabemiɗ ore jauego eru komeru kamasi oɗuine oiji iɗore kamasi ore so fukebemiɗ ore manego. Joiserereɗ maneru komeya, nonji kamasi oɗuine akon komeru oɗuine oiji iɗore kamasi oɗuine fukeiɗ ore jauego. Komeru pakereya, iɗore usuɗ oiji dobe nuko sanaɗgabemiɗgo manego. ¹¹Komebe Anutuji bogbore nume komegone pakerebemiɗ ore origago. Oɗu.

Anuture sisirigo yameɗ keku mogeineo rainebi.

¹²Nakenere iɗi so migo, “Anutuji moge ruaya, oo wape foreru maɗkekerisiere kuririine sosowo bofukeru gogo.” Ore so fukeru gogoyon, Kristo Yesuji roosiɗ enareya ore seɗɗiɗbaɗɗiɗine raugaiɗgo ore yameɗ keego.

¹³O maɗkekerisie ogopune, Anutuji moge ruaya oo so wape forego, oi manego. Moakon iɗi maneru eego: Ya kemukuru ɗadi gabon, oi niga nuko Anutuji ya jiɗomaineo ruame pega, oo obe pipa rabemiɗgo aɗi sogo maneego. ¹⁴Anutuji paibe ropebemiɗ ore oɗga nareru moge oɗu qa nareya. Ore eru Kristo Yesuji munaɗ qa nareya ore nonji eesoigo sanaɗgaru gbiɗ eru Anuture mogeo ropebe iɗoji hendiɗ eri qoruneo kenareiɗ. Oi roinɗgo aɗi sogo maneru moge oobe poretiɗ akon usuɗne qojugaru giniɗgaego.

¹⁵Ore eru mande kuririnoɗuɗke fukegobeneɗ, Anutuji noɗuɗ sosowo mamane moakonde paio Kristo mane mukuru gokimiɗ ore manega. Buɗo more mamane maru furuine mo pe ɗarena ine, Anutuji buɗo yooore uruɗu manebi sagaga, oi oɗuakon miku barariɗga ɗareɗi. ¹⁶Iɗonore manebu qoruine oi iɗi fukeko sagaiɗ: Noɗuɗ damaɗ joroine me pomponine maɗnoɗuɗ kerisieru Anuture kadio go wapebeɗ, eebobore kadi moakon oi akon jikigaru rabeneɗ sagaiɗ.

¹⁷O maɗkekerisie ogopune, nonji eebobone eego, ɗoɗo noɗ ɗone nuru nonde mosi boyoberu goinebi. Goineji ore so oderu pore ɗabeegobi, ɗoɗo yoɗore eebobo oi ɗoneru boyobeinebi.^h ¹⁸Iɗiɗigo boakon yobu

^h 3.17 1 Kor 4.16; 11.1

yoŋoji eeboboyaŋunji Kristo rosi eteru yoŋoyaŋunde aŋigo kosa gogobi. Mariponŋo komeya, ore fuŋine oderu gboreru gogobi. Buŋo oi damaŋ kokoine tiŋtuŋ egu fukenimiŋ ore ŋajibe manebuŋyoŋ, damaŋ yoo oi kuyoku jiŋo obune wakiko migo.

¹⁹Saki fuyaŋunde aŋi sanaŋine sembeneji nemuyaŋuŋ fukega. Ya mimiineke eegobi, ore manebi ropeko kuririyaŋuŋ fukeko sigopou gogobi. Maŋmamaneyaŋuŋ morende eebobo sembeneo kipebi nigiŋ yabeko kosa goku tatariineo misi korugo rakanimiŋ. ²⁰Yoŋoji yuku rakanimiŋyoŋ, goine niŋore qoqodure sa oi Sombuŋgo paibe pega. Moreŋgo kotuine fukeru yayaba akonŋ goku Ofonŋ Yesu Kristo Munanŋqoqo Raunonŋunji moke fukeru oga nobeiŋ ore odigaegobeneŋ. ²¹Iŋoji moreŋ saki funonŋuŋ wakiqoqoine yo oi qowirieme iŋoyoŋunde Sombuŋ saki fu onŋuine kuririquaraŋineke fukeiŋ. Usuŋ onŋuine oi Kristo pe tega. Iŋoji usuŋ onŋuine oiji ŋiŋigo eru moreŋ Sombunde yareya sosowo oi soine sanaŋgaru bawaki nobeko iŋore mea rurumaŋgo rabeneŋ siŋaŋ nobeko gokimiŋ. Onŋu.

Uŋsowoŋ buŋo goine

4 ¹O yoro ogopune, onŋ fukeiŋ ore Ofonji ŋoŋo bapi ŋabeko gbiŋ keru sanaŋgaru dimainebe. Nonji ŋoŋore aŋi maneru ŋone ŋabeinŋgo yameŋ keego. Iŋoŋo jeri enarebuŋ. Botuŋaŋuŋgo gio babe ore foriine fukeko odubi Anutuji ore furi enoreiŋ, ore eru sigopou eru jerieego.

²Minebobo ŋigo yoyoka Yuodia Sintike, ŋokoji pougaru kekepari eru gogobire, onŋ manebonŋ. Ore eru nonji maŋ-ŋakuŋ iŋi bapakarego: Iŋoko Ofonŋke moakonŋ dimagobire, ore eru maŋmoakonŋ eru goinebire. ³O muraŋne foriine, giore kionŋ moko osigaru gobu, go onŋuakonŋ iŋi weu garego: Iŋigo yoyoka yokoji maŋmoakonŋ enimi ore bapi yapeigonŋ. Yokoji noke Bobiaŋ Biŋe sanaŋgaru saueiŋ ore jigo qaku gobu. Yokoji Klemen eru ogopune goine nonŋunde keririŋgo moko jigo qaku gobu. Sosowo yoŋore tina oi gogo sanaŋinere tina buru buk papiago paibe pega.

⁴Damaŋ so Ofonŋke dimaku jerieru goinebe. Jerieinebe buŋo oi ŋeŋe moke migo.

⁵Iŋoŋo denaŋdenaŋ paio ŋiŋigo eyarebi sosowoji kamasinaŋuŋ oi maneinebe. Ofonji wareinŋgo bembengaga. ⁶Ya more manebu so maneru goinebiyoŋ, ya sosowo ore weweŋaŋuŋ Anutu ojibi maneine. Onŋu me onŋu fukeiŋ, ŋoŋo Anutu onŋa wosiru karieru danŋe miku goinebe. ⁷Anutuji maŋwomo eŋarega, niŋo ore fuŋine so mane muku egobeneŋ. Oi mamane mukunonŋuŋ sosowo odureru fuŋine mo fukega. Kristo Yesuke qokotabi dimakabi Anutuji maŋ-ŋaŋuŋ eru buŋo mamaneŋaŋuŋ dobu kiperu iporo ba ŋareko goinebe.

⁸O maŋkekerisie ogopune, buŋone mitariinŋ ore eru uŋsowoŋ buŋo iŋi migo: Wuwunuŋ buŋo so manesuinebiyoŋ, ya sosowo araŋ babeneŋ

kuririineke fukega, maŋ-ŋaŋuŋ oo kiperu goinebi. Buŋo foriine, buŋo poretiŋ eru gbagbataeŋine oi manesuku goinebi. Buŋo aŋiineke maneegobeneŋ, oiji maŋ-ŋaŋuŋ puseko goinebi. Buŋo kobiineke mimiten fukeiŋ ore so fukega, maŋ-ŋaŋuŋ oo qakatoru goinebi. ⁹Nonde eebobo ŋoneru Biŋe buŋone maneru maŋ kiniŋ-ŋaŋuŋgo ruaru robi biŋeŋaŋuŋ fukeya, ŋoŋo oi kegboreru eba eku goinebi. Oŋu gokabi womo Rauine Anutu iŋoji ŋoŋoke dimaiŋ. Oŋu.

Polji Filipai yoŋore yaunde danŋe miga.

¹⁰Nonji Ofonke qakatoru goku ŋoŋore beufi soguine manego. Iŋoŋo ronekoŋ noŋ siŋaŋ nuku moneŋ nareiŋgo aŋi maneru gobuŋyoŋ, uruŋu eniminde fuŋne baaru embimbiŋgabuŋ. Damaŋ joroine embimbiŋgaru gobi Ofonji damaŋ yoo maŋ-ŋaŋuŋ bogboreme afagaru moke bapi nubuŋ. ¹¹Saki funere yobiŋgo ŋeku embimbiŋganobo, ore eru buŋo yo so migo. Nonde ya pega, nonji oke maŋwomoo waigo goiŋgo manego. ¹²Noŋ janjaŋbumbuŋ oderu womoo goboy eru gogo kobiineke batiqatiine tomiri goku womoo goboy. Pi so damaŋ so maŋne waigo eko goiŋgo manego. No gaba enobo me roro ŋenobo, ore eru maŋne so bawaki eego. Yane boakoŋ yobu me kokiine pe narena, oi jibumeŋ. Noŋ yoore fuŋne mane mukuru soine waigo gobemiŋ. ¹³Oi me oi mo fukena, Kristoji basanaŋ nuko ya moji mo so bawaki enareiŋ.

¹⁴Jibu koŋkoŋne ore maŋineone ogo babapi ruaru baafe nubi sagaya. ¹⁵Filipai ŋoŋo oŋuakoŋ nonde fuŋne mane komegobi. Nonji fuŋgaru roregaru Bobiaŋ Biŋe gio baku ŋoŋoke Masedonia prowinsgo goku boke ŋabeboŋ, damaŋ oone fuŋgaru mamananesiŋ kufufuŋ goineji noŋ sakire yayaŋuŋji so kitiŋ nubuŋ. Nonji mande Biŋe yarebe robi biŋeŋaŋuŋ eyayoŋ, sakire mobe mo so bokirie narebuŋ. Filipai maŋkekerisie kufufuŋ ŋoŋo moakoŋji noke kikipe eru gogone kitiŋgabi pesiŋ moneŋ-ŋaŋuŋ roru narengareŋ eku gobey.ⁱ

¹⁶Nonji yare embimbiŋgaru goboy, ŋoŋo oi nonde ruabi Tesalonaika sitio wareya. Ate moakoŋ matayoŋ, ate yoyoka sakinere yare embimbiŋgaboŋ, oi ruabi nondeo wareya.^j ¹⁷Nonji ŋoŋore mebo yaŋu-ŋaŋunde sase so eego, ore eru buŋo yo so quraŋgago. Anutuŋi ŋoŋore ogo babapire tifeine bokirie ŋareeiŋ, nonji foriine sogo oi ŋoŋoreo saueiŋgo manego. ¹⁸Iŋoŋoji damaŋ yoo ya ruabuŋ, oi raugaru nonde ya sosowo oiji kiririne odureru kokoine pe narega. Epafroditus iŋoji ŋoŋore ogo babapi yaŋu-ŋaŋuŋ roru wareru nareme moririineke fukeru gogo. Iŋoŋo pesiŋ tahaŋoŋuŋ ruabi iŋoji roru wareya, Anutuŋi ore aŋiine maneko soine sagaga. Anutuŋi ŋoŋore pesiŋ maneru sabareko kouine fiine junjinaŋ oŋuine fukeru iŋore jiŋomaio isirigame jerieega.^k

ⁱ 4.15 2 Kor 11.9 ^j 4.16 Apo 17.1 ^k 4.18 Eks 29.18

¹⁹Nonde Anutuji touŋmoriri sosowore Rau fukega. Iŋore rounŋo ya sosowo oi tatariine tomiri pega. Ore eru ŋoŋo Kristo Yesuke qakatoru dimaku yare embimbiŋgagobi, oi sosowo pe tega ore so enjareeiŋ. ²⁰Ore eru Anutu Mamanoŋuŋ damaŋ so miteŋ gaeinebeneŋ. Oŋu ebeneŋ Anuture tinabiŋeji damaŋ tatariine tomiri saueeiŋ. Buŋo oi foriine.

Momojo tatariine

²¹Nonji momojone ogopunoŋuŋ gbagbataeŋine Kristo Yesuke moko akon dimagobi, sosowo ŋoŋore ruabe fuga. Ogopune noke yoo gogobi, yoŋoji momojoyaŋuŋ ruabi ŋoŋoreo fuga. ²²Anuture ŋiŋigo gbagbataeŋine goine sosowo yoo gogobi, yoŋoji momojoyaŋuŋ ruabi ŋoŋoreo fuga. Yoŋoreone goineji Sisa-kiŋ koitore morumboŋ pigo gio baegobi, yoŋoji oŋu maneru yameŋ keku migobi.

²³Ofoŋ Yesu Kristore yaŋmoririji ŋoŋoke pe roperu iiruŋaŋuŋ mifiagaine.